

## La Lettre Jèrriaise 21-12-2024 - Les Pathents Hélicoptéthe

Bouônjour, mes bouonnes gens. Ch'est Helen Rom'thi tch'a l'pliaîsi dé vouos présenter la Lettre Jèrriaise aniet, Mardi, lé vîngt-ch'ieune du mais d'Dézembre deux milles vîngt-quatre.

Y'a deux'trais mais, j'fus à un d'vis întérêssant au sujet dé comment qu' nou peux faithe la Ville miyeuthe pouor les mousses. Lé Pâleux nouos d'mandit dé nouos rapp'ler not' trînmousse favorite et i' nouos dit d' nouos buter si ch'tait par-dédans. Autchun d'nous né s' mâtit sus lus gambes. Épis, i' nouos d'mandit dé nouos buter si y' avait autchun adulte à nouos seurvilyi tandi qu'nou jouait. Eune aut' fais, j'restîmes dans nos tchaises et y' avait hardi d'jouêthies dé nouos têtes comme chute sîmpl'ye mais împortante révélation rachinnit.

Don, i' suggéthit qu'un tas d' pathents au jour d'aniet 'taient des "Pathents Hélicoptéthe" tchi dgêpent alentou d'lus êfants pouor les dgetter. Ouaithe qué ch'na fûsse un comprannabl'ye sentiment, lus seurveillance tout l'temps empêche les jannes d'êprouver des nouvelles choses. Et pus împortant, i' n'apprennent pon d'lus mêprînses.

J'n'ai pon autcheune idée entouor comment qué j'survêtchus duthant m'n êfanche. Les gens d'vaient craithe qué j'avais eune tête dé caboche. Jé m'ramémouaithe qu'i' m'veint l'idée qu'i' s'sait hardi pus rapide dé faithe ma touônnée des gâzettes sus man j'va, eune bête auve la tête duthe, même sus un bouôn jour. Quand même, j'réalisis au court-bouoillon qué ch'n'était n'pon ieune mes miyeuthes idées et lé préchain jour jé r'fis sèrvi ma bike.

Avec tout ch'na dans ma tête, j'pensis qu'i' s'sait du fanne d'encouothagi nos p'tites fil'yes Coco et Zephie, âgies dé huit et siêx ans, à rêsoudre des problîemes et au même temps aver eune aventuthe auve ieux. Et don, Pops nouos cachit à la Grève dé Lé et les mousses d'vaient décider comment èrtouônner siez-nous à Ouaisné.

La Grève dé Lé est étourdissante atout sa bouaîs'sie si trantchil'ye, ses falaises êstcherpées et ses sablions d'or. Et oulle a eune diverse histouaithe atout sa forte Tou d'Jèrri et ses bèrrexes, san moulin à ieau et des fortificâtes restées du temps des Allémands.

Comme j'étions des vîsiteurs rédgulîers, les mousses savaient éyou j'étions et bein vite lé trouvaient sus la carte. I' décidâtent qu'la miyeuthe idée s'sait d'phôner Pops et li d'mander s'i' pouvait nous râmasser. Chennechîn 'tait eune hardie bouonne solution mais ayant explyitchi qué ch'n'était pon un chouaix, i' suggéthâtent qué j'allêmes par baté, par avion, sus la bike ou à j'va d'avant d'décider à la fin sus la beusse.

Not' viage sus la beusse 'tait bouôn et j'avions seulement dgiêx minnutes pour attendre la préchainé beusse au Portélet. Et chute fais Coco dit au cacheux d' la beusse où'est qué j'voulions aller. Un accomplissement ênorme!

Auprès vîngt minutes, j'marchions avâû le mont du Ouaisné, pâssant tous les cannards atout lus caqu'téthie, les cotchets aue lus riches plieunmes couleuthées et les poules et lus p'tits pouochîns pliutcheux.

Épis auprès aver mangi tchiques mouaithe, j'étions siez-nous et j'tais déjà à penser entouor not' préchainé touônée. Et bein, ch'na s'sa à Dgèrnésy si y'a un baté!

N'en v'là assez pour aniet. Mèrcie bein pour m'aver êcoutée. Ayiz tous eune bouonne semaine et à la préchainé.